

Landesbibliothek Oldenburg

Digitalisierung von Drucken

Divers Ievx Rvstiques, Et Avtres Oevvres Poetiques

Du Bellay, Joachim

Paris, 1565

A Monsievr Dvthier Conseillier dv Roy, et secretaire D'Estat

urn:nbn:de:gbv:45:1-2815

A MONSIEVR DVTHIER
CONSEILLIER DV ROY, ET
SECRETAIRE D'ESTAT.

DVTHIER, dont la diligence,
Le sçauoir & la prudence,
L'experience & la foy,
D'un ordinaire exercice
Trauailent pour le seruice
De la France & de son Roy:
Encores qu'on ne raisonne
Que de Mars & de Bellonne,
De discorde & de fureur,
De soldatz, & de gendarmes,
D'assaults, de sieges, d'allarmes,
De feu, de sang, & d'horreur:
Ne laisse pourtant de lire
Les petits uers, que ma lyre
Te uient presenter icy,
M'eslant au bruit des trompettes
Le son des douces musettes,
Pour addoucir ton soucy.
Les uers qu'icy ie te chante,
Duthier, ie ne les presente
A ces sourciz renfrongnez,
Auxquelz tel ieu ne peult plaire,
Et qui souuent à rien faire
Sont les plus embesongnez.



Mais c'est pour toy que ie sonne,

Mais c'est à toy que ie donne

Le miel de telles douceurs,

Ou des affaires plus graues

Souuent le soucy tu laues,

Cher nourrisson des neuf Sœurs.

Ne crains point qu'à tes oreilles

Lors qu'aux affaires tu ueilles,

Ie me uienne presenter:

Ma Muse non importune

Essiera l'heure opportune,

Pour tes oreilles tenter.

Elle fournira ta table

D'un entre-mez delectable:

Et en te parlant de moy

Dira combien ie t'honore,

Et de quelz liens encore,

Tu m'as obligé uers toy.

Ie bastis à ta memoire

La plus memorable gloire,

Dont ie fus onques sonneur:

Pendant la monstre ie t'offre

Des pieces qu'au fond du coffre

Ie reserue à ton honneur.